

“ლოკომოტივი” (რუმინეთი) – “დინამო” (თბილისი)

“ლოკომოტივი” (რუმინეთი, ნაკრები): გ. დუნგუ; დ. ვაკარჩი, დ. ვერზანი, დ. მაკრი; გ. ბუში, ა. ფერენცი; დ. კელინი, ნ. რომანი, ა. კოვაჩი, დ. იოვი, ა. ბედანცუ.

“დინამო” (თბილისი): მ. პირაევი, ნ. გაგნიძე, ნ. ძიაშვილი, ი. სარჯველაძე; რ. მახარაძე, გ. ხოჭოლავა, ა. კოტრიკაძე, ი. ვარდიმიადი, ზ. კალოევი, ა. ლოლობერიძე, ბ. ხასაია.

მსაჯი – საერთაშორისო კატეგორიის მსაჯი: ი. ელჩევი (ჩეხოსლოვაკია).

ჩეხოსლოვაკელმა მსაჯმა ი. ელჩევმა ნიშანი მისცა და რუმინელთა ცენტრალურმა თავდამსხმელმა კოვაჩმა ბურთი თამაშში შეიყვანა. იგი მიიღო რომანმა და შორს მიაწოდა ბუშს, რომელსაც საჯარიმო მოედანთან ბრძოლაში წაართვეს ბურთი. ცოტა ხანში კოვაჩმა მაკრისგან მოედნის სიღრმიდან მიიღო ბურთი. შეუფერხებლად გავიდა წინ და კარში დაარტყა. პირაევმა ლამაზი ნახტომით აიღო იგი.

რუმინელთა მიერ ასე მწვავედ გათამაშებულ დებიუტს დინამოელებმა მარცხენა ფრთაზე ორი სწრაფი გარღვევით უპასუხეს და დუნგუს ორჯერ მოუხდა ხასაიასგან ბურთების აღება. მალე თბილისელებმა შეტევის მარშრუტი შეცვალეს და მარჯვნივ გაითამაშეს სწრაფი კომბინაცია. ჯერ ლოლობერიძემ, შემდეგ, ხასაიამ არაზუსტად დაარტყეს კარში.

მე-7 წუთზე სტუმრებმა გადმოინაცვლეს მოწინააღმდეგის მხარეს და მარცხენა ფრთაზე დაკარგეს ბურთი. იგი მიიღო ნ. გაგნიძემ, მოტრიალდა მეკარისკენ და ბურთი მშვიდად გადააწოდა ბედანცუს, რომელმაც ეს “თავაზიანობა” კარგად გამოიყენა და ახლო მანძილიდან ანგარიში გახსნა – 1:0.

სამიოდე წუთის შემდეგ ზუსტად იგივე სიტუაცია განმეორდა “ლოკომოტივის” კართან. ერთ-ერთმა მცველმა ბურთი გადასცა კალოევს, მაგრამ თბილისელთა ცენტრალურმა თავდამსხმელმა ვერ გამოიყენა ის, რაც რუმინელთა მარცხენა გარემარბმა – კალოევმა სულ ახლოდან ბურთი უმისამართოდ დაარტყა.

რუმინელები პირველ ხანებში მთელი გუნდით მოქმედებდნენ მოედნის სრულ ტერიტორიაზე, შემდეგ ეს მთლიანობა დაირღვა. სტუმართა გუნდში საგრძნობლად სუსტი იყო დაცვა და ნახევარდაცვა. ისინი თამაშობდნენ ზონაში, მჭიდროდ არ იჭერდნენ “დინამოს” თავდამსხმელებს, რომლებიც ყოველგვარი კონტროლის გარეშე მოქმედებდნენ მოწინააღმდეგის ნახევარზე. მეტად მძიმე მდგომარეობაშიც კი რკინიგზელთა შუამარბები არ იხევდნენ უკან საკუთარი კარისაკენ. ეს რა თქმა უნდა, მეტად ურთულეობდა საქმეს დაცვას, მაგრამ თავდამსხმელთა ყოველი კონტრშეტევა სახიფათო და მოულოდნელი იყო.

პირველი 15 წუთის შემდეგ ინიციატივა ხელთ აიღო “დინამომ” და დაიწყო რუმინელთა კარის შტურმი. ძნელად შეიძლება ნახოთ მატჩი სადაც თავდასხმა ტექნიკურად, ტაქტიკურად, ფიზიკური მომზადებით ასე ჯაბნიდეს მოწინააღმდეგის დაცვას და ორი ტაიმის განმავლობაში მხოლოდ მინიმალურად გამოიყენოს უამრავი ხელსაყრელი მომენტი. თითქმის ყოველი 3-5 წუთის მანძილზე “ლოკომოტივის” კარის წინ იქმნებოდა მდგომარეობა, რომლის ლოგიკური ფინალი გოლი უნდა ყოფილიყო, მაგრამ თბილისელები უხვად აგზავნიდნენ ბურთებს კარის მალლა, გვერდზე, მაგრამ ერთობ ძუნწად – კარში, რომელსაც შესანიშნავად იცავდა მეკარე დუნგუ.

მე-15 წუთზე ლოღობერიძემ მოატყუა მცველი, მეკარე (საერთოდ, რუმინელი ფეხბურთელები ადვილად ტყუვდებიან დრიბლინგზე) და... ააცილა კარს, მალე ვარდიმიადი და კალოევი სწრაფად გავიდნენ მცველებს შორის და ვარდიმიადიმ არაზუსტად დაარტყა. ცოტა ხანში თავის პარტნიორს მიჰბაძა ხასაიამ. კარგა ხნის მანძილზე დინამოელები არ ცილდებიან რუმინელთა კარს. ყოველ ახალ შეტევას ახალი მომენტი მოჰქონდა, მაგრამ ხუთივე თავდამსხმელი თითქოს შეთქმულნი ყოფილიყვნენ – არაზუსტად ურტყამდნენ.

31-ე წუთი. ბურთი მიიღო კოტრიკაძემ და ძლიერად დაარტყა კარში. აქ მცველებმა წამით მოიგერიეს იგი, მაგრამ ვარდიმიადი დროზე გავიდა საჭირო ადგილას და ზუსტად, ძლიერად დაარტყა მაღალ კუთხეში. დინგუს ნახტომმა ვერ მოუსწრო და ანგარიში გათანაბრდა – 1:1.

ბურთი კვლავ სტუმართა კართანაა, კვლავ "ბომბავენ" კარს თავდამსხმელები, კვლავ სივრცეს სერავს ბურთი კარის გარშემო.

ტაიმის დასასრულს ამოდრავდნენ "ლოკომოტივის" თავდამსხმელებიც. მათ რამდენიმე კარგი კომბინაცია გაითამაშეს უბურთო მოთამაშის აქტიური მონაწილეობით. რუმინელები მშვენივრად იყენებენ თავისუფალ ადგილზე გასულ მოთამაშეს. საყურადღებო იყო კოვაჩისა და კელინს შორის გათამაშებული მრავალსვლიანი კომბინაცია გაგნიძის, ძიაშპას, სარჯველაძისა და ხოჭოლავას შორის, როცა ორი თავდამსხმელი ყოველთვის პოულობს თავისუფალ ადგილს ოთხ მოწინააღმდეგეს შორის.

ამ ანგარიშით 1:1 გუნდები წავიდნენ შესვენებაზე.

მეორე ტაიმში რუმინელებმა იოჟის ნაცვლად მინდორზე გამოიყვანეს ოლარუ. პირველი 5 წუთის განმავლობაში მათ კართან მოწოდებულ იქნა 6 კუთხური საჯარიმო, მაგრამ არც ერთ მათგანს შედეგი არ მოჰყოლია. თბილისელები გადამწყვეტ მომენტში ან კარგავდნენ ბურთს, ან არაზუსტად ურტყამდნენ. მე-7 წუთზე სარჯველაძემ ზედ კართან მიაწოდა საჯარიმო, რომელიც კალოევმა თავით ძლიერად გაგზავნა კარში. დუნგუმ ბრწყინვალე ნახტომში აიღო უაღრესად ძნელი ბურთი. ცოტა ხანში, სტუმართა ერთ-ერთი ეპიზოდური კონტრშეტევის დროს გაგნიძემ ისევ უყურადღებოდ მიაწოდა ბურთი მეკარეს, რომელიც კინაღამ გოლით არ დამთავრდა, მაგრამ პირველმა მიუსწრო ბედანცუს.

მე-12 წუთზე კალოევმა დაახლოებით 20 მეტრის მანძილიდან უძლიერესი ბურთი გაგზავნა რუმინელთა კარში. დუნგუს ნახტომი ამაო იყო, მაგრამ ბურთი მოხვდა ძელს და დაუბრუნდა მოედანს.

30-ე წუთზე ერთ-ერთი შეტევისას რუმინელთა კართან ბუმს ფეხზე აუცურდა ბურთი, რომელიც მიიღო კოტრიკაძემ და დაუყოვნებლივ კარში გაიტანა იგი – 2:1.

ეს ანგარიში დიდ ხანს არ შერჩენია ფარებს. მალე რუმინელმა თავდამსხმელებმა კარგად გამოიყენეს "დინამოს" მცველთა უხეში შეცდომა და კოვაჩმა გაათანაბრა ანგარიში – 2:2.

ამგვარად, თბილისელებმა ვერ შეძლეს უამრავ შესაძლებლობათა გამოყენება, ხოლო რუმინელებმა, პირიქით, აჩვენეს, თუ როგორ ეფექტურად შეიძლება გამოყენებულ იქნას მოწინააღმდეგის ყოველი შეცდომა.

თბილისის "დინამოს" 1955 წლის პირველი საერთაშორისო შეხვედრა ფეხბურთში დამთავრდა ფრედ – 2:2.

ბ. ქორქია.

1 ივნისი, 1955 წ.